

N guant fascian per l Museo de l'Argentina

Vegn domanà l didament de la jent per poder meter fora a Concepcìon n testamonech de noscia cultura

Apel - Enstadì te Fascia l'é ruà n preve che vegn da l'Argentina e che travers projec de cooperazion internazionèla l'ha strent na fradaa coi Studafech de la Provincia de Trent e ence de Fascia.

Chest religious di Focolarins, che l'ha inom Jorge Lionello Esteban e l'é ence enjegner e professor, l'é stat compagnà tel Museo Ladin e dò sia vijita l'ha scrit na letra olache l disc de esser restà encantà da la beleza del Museo e da l'acolièza abuda, ma soraldut dai guanc che l'ha vedù metui fora.

P. Jorge Lionello spiega che el é stat l promotor, te sia zità de naa, Concepcìon (Provincia de Tucumàn), de n Museo antropologich pissà per creèr l lech de cultura e leam anter i Paìjes del mond e che posse didèr l'economia, con na perferida de valuta a nivel turistic.

Concepcìon - disc l preve - l'é na zità de 60.000 sentadins a pec chilometri dal parch de enteress naziònel de Los Alisos, che l'é dò a vegnir svilupa e valorisà, e dal 2016 l'é stat envià via n percors per valorisèr ence l'aspet cultural, scomenzan la realizazion tel zenter de la zità de n Museo antropologich che vel leèr la tradiziòn de l'Argentina con cheles de desvalives lesc de l'Europa e del mond, metan fora guanc e etres elemenc carateristics.

Te si vijes P. Jorge Lionello l'ha jà podù portèr a Concepcìon n muie de guanc da desvalives Paìjes da l'Àfrica, Asia, Europa e Medio Orient, che vegnarà metui fora sotrisan ence l spirit de fradaa universala di popoi, con sia desferentes cultures e religions.

Apede a vigni guant metù fora se



Guanc fascegn metui fora tel Museo a Sèn Jan.

podarà lejer l'nom de chi che l'ha sport e mingol de spiegazion - per spagnol e per inglese - sul lech da olache l vegn e la cultura del post.

Aldò de chest P. Jorge Lionello Esteban l'ha domanà de slarièr fora l'apel a duta la jent ladina, domanan se zachei aessa n guant tradiziònel fascian da poder sporjer per l meter fora te chest Museo de l'Argentina. Chi che podessa didèr i pel se oujer al Museo Ladin de Fascia (0462.760182), che é a la leta per tegnir i contac con l preve argentin. (lg)